

MEP despues di encuentro cu expertonan riba efecto di salud

Awor mas cu nunca mester para e proyecto di molina di biento na Urirama



Parlamentarionan di MEP tabata presente na Renaissance Conference Center riba invitacion di Residentenan Afecta di Urirama. Durante e presentacion Parlamentarionan a haya mas informacion cientifico y prueba con malo e efecto di molina di biento ta riba salud di hende. Esnan cu ta biba den cercania di molinanan di biento hopi biaha ta haya problema cu vertigo, insomnia, bista, y debi na alteracion hormonal cu por resulta den problemanan cardio-vascular.

Un pareha Mericano cu a wordo confronta cu problemanan asina despues cu Gobierno a pone molina di biento serca di nan cas na Maine, a conta cu eynan, ora un mama pone su yiu drumi, e ta puntre: Bo a corda skeiro djente? Bo a corda haci un oracion? Bo a corda bebe bo pilder di drumi? Ayanan dokternan ta dunando muchanan pilder pa drumi, debi n'e efectonan di e molina nan di biento.

Den oranan di anochi tambe MEP tabata presente n'e pre-

sentacion di e expertonan na Centro di Bario Noord, caminda porcierto politiconan di AVP a briya tambe cu nan ausencia. Lider di MEP, Evelyn Wever-Croes tabata hopi determina despues di e presentacion aki: "Awor mi ta mas convenci cu nunca cu nos mester para e proyecto aki. Ministernan tambe a haya e informacion aki, y mi ta duda cu sabiendo tur esaki, tog nan ta sigi cu e idea absurdo di pone molina di biento.

Diasabra mi a pasa patras di



Alto Vista y mi por a mira cu trabounan ta continua riba e plataforma nan poni p'e molinanan di biento.

Mi por a mira tambe cu e Kapel di Alto Vista tanto diasabra como diadomingo ta ricibi hopi bishitante. Ta tristo pa mira un naturalesa asina bunita y un lugar asina sagrado, lo por wordo afecta. Nos partido NO ta contra energia alternativo, nos ta sostene, pero e mester ta sostenible pa tur hende", segun Evelyn Wever-Croes.

MOTIBONAN PAKIKO MEP TA CONTRA

Partido MEP ta contra e parke di molina n'e lugar ey pa diferente motibo. 1. E inversion miyonario aki lo NO baha costo di bida, no costo di coriente. Esey WEB a confirma den Parlamento.

2. Molina di biento tin e riesgo di afecta salud di hende y awe nos a wordo convenci di esaki

3. E molinanan ta afecta un parti di naturalesa hopi bunita pa Aruba y ta afecta e parti sagrado di Kapel di Alto Vista

4. E aventura miyonario aki lo afecta e situacion financiero di WEB severamente, nos no kier trece e compania aki den desbalance.

Segun lider di MEP, e proyecto aki NO ta sostenible, pa usa e palabra di Mike Eman; ta solamente si e ta bon pa tur hende, e ta sostenible. Pero e proyecto aki ta malo p'esnan cu ta biba eybanda, pa motibo di salud, y e ta malo pa henter e pueblo cu mester sigi paga prijsnan halto di coriente.

Di su parti MEP lo urgi Presidente di Parlamento pa yama e reunion mas pronto cu ta posibel, cu MEP a pidi casi 6 luna pasa, pasobra mientras tanto si trabounan ta sigi n'e costa banda di Urirama.